

Schreggmimpfeli
2003



Fasnacht 2024

OH SCHREGG...

Ach du Schregg, s'isch wiirgglig woor
Uns git's scho sit 20 Joor
Scho so lang tien mir z'ämme pfyffe
drummle, laufe, Märschli schlyffe,
bummle, brunche, z'ämme ässe
S'Minigöfle nit z'vergässe!

Im Herbscht go feyne Wyy brobiere
Zum Jubiläum fein diniere
Gmeinsam schwätze, gmeinsam lache
das isch das, wo mir so mache

Im Null-Vier hesch uns s'erscht Mol gsee
Am Cortège mitem Défilée
E neii Clique, das macht Spass
Drey Dääg z'ämme uf dr Gass

Hesch dra dänggt? Bisch drey Tääg bsoffe?
D'Sujets hämr immer troffe
Eb Grössewahn, eb ai Theater
Nach drey so Tääg hesch Musggelkater

Au Mathe-Formle hesch mol gsee
Mir Schreggis hän do toll usgsee
Als Pop-Art-Kinschtler simr gloffe
Fir gueti Kunscht, do sin mir offe

E paar sind gange, witterzooge
Doch mir hän uns do nie lo blooge
Hän unser Sippli sälber kocht
Und neii Lyt ind Clique brocht.

Und simr ehrlich, wie so oft
Entwigglihschilf kunnt unverhofft
Nit alli kemme us dr Stadt
Doch trotzdem hämr's immer glatt

Z'ämme simr truurig worde
Wo so viel Lädeli sind gstorbe
Au simr zimptig ummegsumpft
Und hän uns sälber ibertrumpft

E Highlight isch denn sicher gsyy:
Als Hippies laufe mir verbyy
Hän wie die Wilde ungeniert
Peace-Out so richtig zelebriert

Mir sind dozmol au verschrogge
dass d'Mässe nimm am Ryy tien hogge
Dass mir do alli tien vertryybe
und d'Hayeks nimme z'Basel blyybe

Denn het's uns paar Johr richtig gstungge
Hän mit Masgge und Reerli dr Waggis trungge
Hän nimme pfyffe, uns nimm gseh
Nur dra z'dängge macht uns weh

In so viel Zyt tuet viel basiere
Rot-Blau tuet iiberall brilliere
Doch ach du Schregg, wie isch das jetzte?
Wo ich das schrieb, sind die fascht Letschte!

Unser Stadtbild, das isch woor
Seht nimm us, wie vor zwanzig Joor
Zwei riese Diirm stöhn jetzt am Ryy
Und s'wärde nit die letschte syy

Zweinullvier amme, wenn das hesch welle
Hesch am Weekend denn ins Kino kenne
Ai Filmtheater nachem andre
Hesch vo aim zum andre kenne wandre
Hit git's das fascht niene mee
In de Staine kasch nur Böörger gsee

Syt Zwanzig Johr geen mir in Baize
Sperber, Schnabel, wie die heisse
Doch, ach du Schregg, was goot do ab?
Z'Basel wärde d'Baize knapp

Mir Schreggis wänn jetzt Party mache
Zum Jubiläum leen mir's grache
Mir gniesse drey Tääg jubiliere
Pfyffe, ruesse, z'ämme fyyre

In zwanzig Joor, wie isch das denne?
Wärde mir uns denn no kenne?
Keine weiss, s'ka keine saage
Do tien mir uns nit beklaae

D'Fasnacht wird's au denn no gää
Prosch! Mir göhn jetzt ein go nää!

Informazioone zue der Laddärnenuusstellig
kennsch jo scho vo allen andere Zeedel.